A Dyker's Compliments To Her Neighbours

Chorus

Keep yer ain fish guts tae yer ain sea maws Anster daws, tattie shaws Keep yer ain fish guts tae yer ain sea maws Lyin amang the deid craws

An wha's acht you ma bonnie lass That moved here in the simmer? Ah kent yer faither at the scale He's a torn-ersed Pittenweemer

Ye lookin at me, ye Anster daw? Ah'll cowp ye in a dub sir An wha cried ye a partan face An ye sae like a lobster?

What's that ye're sayin? Ah canna tell Ye styipit shilpit moaner Ye're nae frae here, Ah'm shair o that Ye're a St Minnens droner

Ye can keep yer Crail an Pittenweem Yer Anster an St Minnens Daft Dyker's whit ye cry us aa Awa back hame, guid riddance